

四庫全書

史部

欽定四庫全書

平定準噶爾方略續編卷二十

乾隆二十八年春正月辛酉

諭伊犁將軍明瑞等預備移駐官兵各事宜

上諭軍機大臣曰新疆平定有年伊犁應多駐官兵以籌久遠昨諭將涼州莊浪等處官兵攜眷遷移交軍機大臣詳悉妥議因念官兵三四千名合之家口不下萬人所有營房糧餉俱當預為備辦著

傳諭明瑞等將此項移駐官兵作何建造城垣廬舍及給與糧餉之處先行籌畫一面辦理即行具奏又

諭曰明瑞等奏稱伊犁駐防屯田官兵及貿易商民日以增多所有附近薪木俱經取用樵採之處漸遠今查勘洪郭羅鄂博有產煤之地已傳示兵民等有願行開採者聽其前往等語開採煤窰以接濟日用自屬要務但兵民既皆往採則羣聚雜處

不能無爭鬪之事更當留心約束且伊犁為厄魯特故地蒙古風俗以游牧資生若居處飲食竟似直省駐防官兵則日久漸至頽惰著傳諭明瑞等將索倫察哈爾兵丁令其照常游牧即滿洲兵丁亦不宜常居城市仍令其兼以游牧為事即可搏節薪芻而伊等亦不忘本業甚有裨益著即遵照辦理

壬戌

諭喀什噶爾辦事尚書永貴等辦理拔達克山等處

事宜

上諭軍機大臣曰近因拔達克山霍罕使人入覲詢
素勒坦沙搶掠博洛爾一事據稱博洛爾沙呼沙
默特於上年害素勒坦沙之弟是以統衆復讐並
非以舊事支飾又詢額爾德尼伯克搶掠額德格
訥一事據稱額德格訥人等曾搶掠安集延額爾
德尼始行報復且俱云若遣人曉諭自當遵行等

語看來外藩相攻亦互有曲直不得謂之無因永
貴新柱等此時當行文曉示不必張皇辦理但該
部落等一切情事自應據實奏報若專云曉示而
不問情事之輕重倘有貽誤則伊等當任其咎俱
著傳諭知之

癸亥

葉爾羌辦事尚書都統新柱等疏奏移文拔達
克山情形

新柱等奏言十一月二十七日葉爾羌回人密爾咱納喇特等往拔達克山貿易遇素勒坦沙寄有呈文一件臣等譯看據稱伊領兵至齊特喇爾攻殺讐人以伊弟沙卜多爾噶達爾為阿奇木伯克駐守其地其博洛爾頭目沙瑚沙默特既為

天朝臣僕仍令照舊管轄等語臣等查齊特喇爾曾經歸附素勒坦沙何得攻取其地又聞波羅泥

都之尸仍潛瘞於牌租阿巴特現擬移文斥責
並行索取十二月初一日臣等遣伯克薩里等
持書問罪令其給還齊特喇爾土地人民獻出
波羅泥都尸骸及其妻子若稍有抗拒即領兵
進討並與布魯特散秩大臣阿奇木本城伯克
鄂對等商調兵丁計四城所有滿洲索倫兵及
酌派布魯特回人共三千八百餘名俟薩里回
時酌量行止奏入

上諭軍機大臣曰拔達克山雖應辦理但宜俟薩里
前往曉示果能遵奉約束尚可寬宥其或狡飾延
緩必須用兵新柱等當遵屢降諭旨酌調伊犁官
兵務期一舉竣事即此次素勒坦沙稍有支吾不
妨再遣一使姑示羈縻藉以集我兵力此時不可
輕發

甲子

議駐防伊犁兵丁事宜

軍機大臣奏言臣等欽奉

諭旨酌議移駐滿洲蒙古兵丁查現在涼州莊浪所
駐滿洲蒙古兵三千二百名閒居內地漸忘本
業伊犁為新疆總匯自應挈眷移駐以裕操防
至所駐漢軍一千名既不便一律遷移且從前
有許令出旗之例應與各省漢軍俱交該將軍
總督等裁汰其所裁額缺名糧令黑龍江將軍
察哈爾總管於所轄壯丁之情願移駐伊犁者

選索倫一千名察哈爾一千名作為馬甲將額
缺錢糧及鹽菜銀兩全行賞給令赴伊犁駐防
合之涼州莊浪官兵共五千餘名酌分四年陸
續派往臣等酌議本年派索倫兵五百名察哈
爾兵五百名於四五月間起程緩行前往伊犁
其涼州莊浪官兵自來年起編為三隊分三年
前往則一切安插事宜可以從容辦理奏入
上從之

己巳

賜愛烏罕愛哈默特沙

勅書

皇帝勅諭愛烏罕愛哈默特沙爾遠在外藩向慕仁
化遣使入覲具見悃誠朕以葉爾羌大臣奏報特
派侍衛迎護爾使和卓密爾哈等前來入覲朕疊
沛恩施屢申宴賚賜爾蟒錦緞疋絢綾器什使人
歸日爾其祇受又賜爾使及隨從員役緞疋皮張

器什銀兩各有差并諭爾知之覽爾所進表文請
相去遼遠向為準噶爾回部所隔未能通使中國
今聞諸部率服不勝欣慰是以入覲朕深為喜悅
至準回諸部朕非利其土地人民因伊等自相殘
害羣生不安是用發兵拯救從前準噶爾達瓦齊
乘亂自立旋為大兵擒獲阿睦爾撒納已降復叛
大兵窮追至俄羅斯遂伏冥誅及回部霍集占克
弟負恩反噬敗逃至拔達克山為素勒坦沙所殺

獻馘歸城今伊犁葉爾羌等處咸入版圖霍罕布魯特諸部盡為臣僕朕寬其貢賦有來修歲事者優加賜賚爾雖逖聽應亦聞知至爾所奏瑪爾塔汗納巴拉池聞爾取扎哈那巴特城鳩其鄰部合馬步各數十萬衆來爭至奇里納勒聞爾領衆前來伊等俱避入帕尼帕特城爾攻圍六月殲其大伯克數十人黨衆十萬餘獲金銀器械無算夫納巴拉池既能鳩合黨衆如許乃未經接戰即入堅

城坐待誅戮其事殊不可解爾又云欲往攻布哈爾聞已歸附中國不使侵伐足昭恭順之忱朕為天下共主中外一視賞善罰惡惟秉至公爾此次因素勒坦沙抒誠遣使其循理守分可知且如爾奏數年來各處攻戰未獲稍安則爾之屬人亦殊勞苦尚其和協隣封休養部落俾羣享太平之福以受朕恩澤於無窮特諭又

賜拔達克山素勒坦沙霍罕額爾德尼伯克右部哈

薩克烏爾根齊哈雅卜奇齊玉斯努爾賚巴圖爾
等

勅書各一道

辛未

以奏事遺漏列名及擬補伯克錯繆

訓飭辦事尚書都統永貴新柱等

上諭軍機大臣曰近因永貴等會議蠲免回人賦役
一摺未列額敏和卓及玉素富之名已降旨訓示

今伊等會議擬補伯克員缺之奏復然殊不可解
前此或謂所辦係加恩回衆之事伊等不欲市德
署名已屬無謂至補授伯克自應同伊等商辦復
有何嫌疑不行開列額敏和卓等俱久隸臣僕用
至叅贊大臣伊等如意欲辭避尚宜曉示令其勿
存形迹且不但此兩人即鄂對噶岱默特等若身
當叅贊亦無不同辦事之理至所辦補授伯克
一事尤未妥協凡同部六品以下小伯克伊等可

擬定正陪具奏若各城阿奇木則總辦事務之員
與內地督撫相似宜開列應行補授人員具奏候
朕特簡何得與小伯克視同一例永貴新柱等諒
不敢專擅然此實謬誤之大者俱著傳諭申飭

士申

命酌減庫爾勒五古爾回人應交官糧十分之二

上諭軍機大臣曰達桑阿奏稱庫爾勒回人五百八
十二戶玉古爾回人五百九十四戶每年各交官

糧七百石今撥往伊犁之回人一百四十七戶雖在交糧額內而阿克蘇和聞已查出多倫回人五十六戶分送二處補額其戶口不甚相遠應仍照舊額徵收糧石等語撥往伊犁回人雖以多倫回人抵補但較之原額究屬不敷仍令照舊交糧不無攤派著加恩將庫爾勒玉古爾回人應交糧石酌減十分之二以示體恤

戊寅

議撥補新疆等處馬匹事宜

烏魯木齊辦事副都統旌額里等奏言烏魯木齊每年貿易哈薩克馬不過三千餘匹本年九月至十二月即易馬四千二百匹將來日漸增多請照軍機大臣原議撥補新疆額缺有餘即以撥補肅州等處標營倒斃之數臣等擬於烏魯木齊常留馬一千匹以應差務再留七百匹備阿克蘇調撥餘於來年四月送往巴里坤牧

放以供安西提標及肅州等處撥補之用奏入
得

旨軍機大臣議奏尋議查上年楊應琚等請以烏魯
木齊貿易馬匹撥補內地缺額經臣等議准但
現在欽奉

諭旨令索倫察哈爾餘丁及涼州莊浪駐防兵丁陸續
遷往伊犁更須廣設牧羣以資生殖臣等酌
議先將孳生馬匹送往伊犁將驕馬暫留烏魯

木齊以備調撥如於應留之一千七百匹外仍有盈餘即陸續送至伊犁以備撥補營缺將來與哈薩克交易當以孳生馬匹為要每年彙奏馬數俟新疆足額之時再行撥補內地奏入上從之

辛巳

命酌辦換班綠旗兵丁應扣舊欠公項

上諭軍機大臣曰從前派往軍前官兵有中途減撤

者所支俸賞銀兩曾請俟將來屯戍換班時扣還
今據鄂弼奏現在換班兵丁先於應給銀內扣還
十分之二其餘分作兩年完給等語為期尚覺太
迫著加恩定限四年俾得從容展扣以示體恤至
所稱逃兵一項兵丁雖已在逃豈竟盡無家屬乃
既玩視軍紀又恃有他人為之代賠情實可惡若
一體展限代扣則不法之徒轉以領銀潛逸為得
計著傳諭該撫務令嚴行緝獲按數著追毋任漏

網

癸未

定邊左副將軍成衮扎布等疏奏擒戮烏梁海
庫克新等收其游牧

成衮扎布等奏言據都爾伯特親王策凌烏巴
什烏梁海內大臣察達克副管旗章京莫尼扎
卜等呈稱烏梁海庫克新等投入俄羅斯又掠
哈薩克馬匹我等情願自行辦理隨領兵前往

捉生詢問知庫克新在和羅圖游牧遂晝伏夜
行前往掩襲伊等驚潰逃竄山僻復深入攻擊
將宰桑庫克新及伊弟等並所屬五十八人俱
已擒戮收其妻子給賞兵丁其餘衆七十四戶
俱行收取再從前叛出宰桑呼圖克納木奇之
弟瑪木特等游牧在俄羅斯圖喇居住以雪大
不能前往所獲人數內有納木奇瑪木特之子
詢據供稱因鄂木布郭勒卓輝之亂不得已投

入俄羅斯時常驚恐情願投回我等因遣往招撫令其於雪消後前來等語臣等酌量將招撫人戶分給察達克等管轄又詢出為首搶掠哈薩克牧羣之索隆鄂烏努雅克等由驛站解送以備查詢其庫克新首級於路口梟示俾衆人共知警惕奏入得

上旨策凌烏巴什等俱著賞給緞疋其著有勞績之官員兵丁等著照追捕塞外騰之例分別賞給緞疋

銀兩

甲申

命工部侍郎納世通為叅贊大臣駐喀什噶爾辦事
原任巡撫三品頂帶阿思哈前往伊犁協同將軍
明瑞辦事以散秩大臣伍彌泰前往烏魯木齊協
辦事務

丁亥

議派撥索倫兵丁辦裝事宜

黑龍江將軍國多歡奏言軍機處議准派撥索倫兵丁挈眷移駐伊犁行文知會臣即將欽奉恩旨傳諭選派壯丁一千名以佐領十員驍騎校十員帶領分為二起於春夏陸續挈眷前往其應行賞給官項及次起兵丁於何處過冬候軍機處議覆行知再所派索倫兵應由克爾倫取道烏里雅蘇台前住請交理藩院派出筆帖式領催選帶嚮導行走奏入得

旨原議之大臣等議奏尋議臣等前議頭起索倫兵不必挈眷附入次起前往今既據稱索倫兵向無跟役自應准其挈眷同行其賞給官項應照上年派往伊犁之察哈爾官兵例每戶給整裝銀三十兩駝一隻折價銀十八兩人給馬一匹帳房折價銀四兩鑼鍋折價銀二兩起程之時裹帶兩月口糧每丁月給鹽菜銀一兩五錢俟辦給孳生牲隻再行停給伊等既無跟役各賞

銀十兩置辦軍器其次起兵丁應於何處過冬
及派出筆帖式領催等於喀爾喀選帶嚮導行
走俱交與成袞扎布酌辦再臣等近據察哈爾
都統巴爾品奏應派之餘丁一千名不必分翼
分旗惟揀選壯丁作為兩起前往所有帶領之
員欽奉

諭旨派出達克塔納成果即令伊等先後行走一應
給與行裝產業事宜俱照上年之例辦理奏入

上從之

二月辛卯

以阻止追捕賊匪意存怯懦

訓飭定邊左副將軍成衮扎布等

上諭軍機大臣曰成衮扎布等奏巡查額爾齊斯等處公多爾濟策登等呈報據烏梁海告稱有哈薩克九人前來殺害烏梁海三人掠去羊馬什物隨究出賊匪游牧前往追捕因恐多爾濟策登等兵

力不足令其酌量行止若追捕不及即行轉回等語哈薩克邊境人等乘間搶掠烏梁海情節可惡自應擒治以示懲創且已知賊匪名目何難辦理乃成衮扎布慮兵力不足遣人往阻伊身為將軍派員巡查邊境宜飭令擒拏賊匪而轉於具報之事戒其勿行似此意存怯懦甚屬錯謬莽古賽雅朗阿俱以叅贊協同辦理之人自應規勸亦復隨同附和所司何事俱著傳諭申飭

丙申

議駐劄伊犁挈眷兵丁事宜

軍機大臣奏言臣等欽奉

諭旨籌議涼州莊浪駐防兵丁移駐伊犁一事查建
造城垣房舍必須預為經理而所支糧餉亦必
量其定數食用現在伊犁屯田歲入糧餉三萬
五千餘石除給該處官兵外尚有盈餘但本年
所派索倫察哈爾及移駐涼州莊浪兵丁不止

萬人仍需糧三萬石應請再派屯田兵一千五百名若由內地調撥未免煩費查臣舒赫德臣阿桂等據回部各城伯克等告稱情願遷居伊犁之人甚多應令明瑞等與土魯番公木薩同各駐劄大臣等籌議照從前辦理約以一千五百人為率不足再以綠旗兵充補其伊犁城署營房工程臣阿桂在彼所役綠旗兵一千人一年始竣今亦請添綠旗兵一千以三年為限至

伊犁之察哈爾厄魯特等俱給與孳生牛隻今
添駐之索倫察哈爾等亦當一體辦理請交都
統巴爾品等揀選牧羣牛四千隻羊二萬隻令
派出之索倫察哈爾等陸續帶往或伊等不能
照管即酌派官兵協助其作何分給孳生交明
瑞辦理再塔爾巴噶台等處駐兵臣阿桂等原
奏於明年駐防但伊犁現有增辦駐防屯田營
造之事應俟移駐伊犁官兵竣事再行辦理奏

入

上從之

壬寅

烏魯木齊辦事副都統旌額理等疏奏核銷屯
田牛馬事宜

旌額理等奏言查從前安泰等會議烏魯木齊
屯田牛馬每年准銷倒斃分數馬百匹准銷四
分牛百隻准銷二分經部覆應照巴里坤之例

一體作為二分銷算臣等查得屯田馬匹非其素習且向例不支食料豆是以傷損者多又請酌為通融銷算仍未覆准歷年以來核算實在傷損自一二分至五七分不等若加餽豆料則每馬需豆價三兩二錢零哈薩克貿易馬匹原價不過三兩尤為多費臣等竊思此項馬匹與支食料豆之馬不同則倒斃分數亦宜有別請通融銷算將馬匹准銷二分半牛隻准銷一分

半若倒斃逾數仍著賠補至屯田牛隻較馬為
優臣等前請撥伊犁餘牛五百隻合之現存有
一千餘隻再將哈薩克等所帶牛隻陸續補額
將來屯田所需馬匹可以漸減矣奏入報

聞

甲辰

命授侍郎卞塔海為正紅旗漢軍副都統往阿克蘇

辦事

上諭軍機大臣曰海明在阿克蘇年久著授盛京禮部侍郎卞塔海為正紅旗漢軍副都統前往更換其侍郎員缺著永寧調補兵部侍郎員缺著旌額理補授

丙午

議解送伊犁孳生牛羊事宜

軍機大臣奏言臣等昨議駐防伊犁之索倫察哈爾兵二千名請選牧羣牛四千隻羊二萬隻

其作何解送之處咨行該都統巴爾品定議今據奏稱數年來解送烏里雅蘇台巴里坤等處牛羊惟牛性不能行遠倒斃過多若一牛折給五羊計牛四千約可折羊二萬亦不須另派官兵即以頭起行走之察哈爾五百名分為十起共解羊四萬隻較有裨益等語臣等查伊犁現有滿洲索倫兵一千五百名上年挈眷之察哈爾兵一千名今年所派五百名俱陸續即到儘

足敷用此次兵丁五百名即以解送羊隻至牛隻既不能行遠自應以羊折給其分起解送各事宜俱如所奏辦理再臣等愚見伊犁屯田必需牛隻未便停其辦送查喀爾喀所有牛隻距伊犁較近請令成衮扎布或於牧羣揀選或行採買每年辦牛一千隻以內解送伊犁不必限以定數更寬其行走程期於屯田自有裨益奏

入

上從之

癸丑

諭涼州將軍巴祿等移駐涼州莊浪官兵各事宜

上諭軍機大臣曰巴祿所奏籌辦涼州莊浪滿營官兵移駐伊犁及漢軍官兵出旗各事宜二摺已交軍機大臣議奏至另摺所請於涼州莊浪甲兵三千二百名內查其年老殘廢孤寡幼稚之戶酌留五百名統歸涼州駐劄改設城守尉一員管轄等

語朕初開時以移駐之兵既皆精銳足壯新疆營伍其老弱殘廢之跋涉維艱者自不妨區別酌辦至於遷移帑項不致虛糜猶其後馬者也當於摺內批諭即可併入議行但思設立駐防原為地方起見今新疆開拓二萬餘里涼州莊浪一帶已成腹地是以特准軍機大臣所議將該處駐防官兵移往伊犁漢軍則令改調綠旗營缺則聽其散處為民而俸餉經費即可挹彼注茲化無用為有用

且伊犁屯田豐收水草暢茂尤於伊等生計有益
今若因老弱廢疾孤幼等戶遂酌留兵額五百名
改設城守尉等官不但非駐防體制而耽逸惡勞
安土重遷之徒勢必紛紛託詞規避此風斷不可
長即該將軍亦轉覺難於辦理此內果有前項戶
口萬不能遠赴伊犁者伊等原從西安移駐涼州
莊浪至今不過二三十年自可體察實情量為酌
留仍令回至西安交該將軍歸入佐領就便安插

又何必為此委曲遷就之舉耶另摺所奏不必再議仍將此詳悉傳諭巴祿楊應琚知之尋軍機大臣議奏言巴祿楊應琚奏會議涼州莊浪滿洲蒙古兵丁挈眷移駐伊犁製備行裝及車馬路費五條欽奉

諭旨交臣等議奏謹議一應需俸賞請照察哈爾兵丁派往伊犁之例賞給查上年派撥察哈爾兵一千名挈眷前往伊犁經臣等議准官員賞給

一年俸銀兵丁照換防索倫兵賞銀二十兩因
挈眷增銀十兩今涼州莊浪官兵應請照例辦
理官兵跟役亦照例賞銀二兩於分隊起程之
前賞給一應需馬匹車輛請照例分別增加折
給查官員馬兵跟役向有原馬乘騎惟步兵應
照例自涼州莊浪至哈密每兵二名合跟役給
車一輛其哈密至伊犁應換給馬匹每名折銀
八兩自行僱覓俟至伊犁仍繳還十分之三作

二年坐扣至舊例三人給車一輛此次挈眷行走未免不足請每戶添給車一輛俱應如所奏辦理一應需路費鹽菜口糧請照西安提標移駐烏魯木齊之例支給查從前挈眷移駐兵丁每百里按口給盤費銀一錢二分小口六分其官員按品支給鹽菜銀兩兵丁月支銀一兩五錢跟役五銀仍日支口糧八合三勺其官兵跟役鹽菜銀祇以一名支給并不許混入眷口數

內支給路費一應需帳房鑼鍋請照察哈爾移
駐之例折銀自備查挈眷兵丁自應折給帳房
至伊等家居鑿具自所常有若因起程一切從
新置買殊非情理應無庸置議一經行道路應
由闢展烏魯木齊臺路前赴伊犁查前項官兵
人數衆多自應從臺路行走仍令該將軍總督
及各駐劄辦事大臣等遴委委員沿途照料務
期安靜妥協奏入

上從之又

諭軍機大臣曰巴祿揚應琚所議涼州莊浪瀘營移駐伊犁事宜一摺如加賞整裝銀兩及增給車輛各條業經軍機大臣等議覆降旨允行至所請鍋價二兩之處其事本屬瑣屑非體自當分別指駁在巴祿等不過欲為伊等多得分例起見殊不知伊等每戶既已從優賞給又加以沿途車馬路費所得並不為少何至炊爨之具尚煩總總過計伊

等在涼州莊浪豈家家俱不熟食耶但伊等辦裝
之項如先時早為給發兵丁到手既不免任意花
消若給發於瀕行之時又恐置備不周而購買亦
受居竒之累何如先事官為預辦臨時散給所餘
者留至伊犁分授伊等為長久生計尤為費省而
事集耶著傳諭楊應琚一面自往蘭州會同巴祿
及莊浪副都統計其必需各件預行妥備撥用更
覺便易即如營中飼馬自拴之費不及攢槽之省

此一定之理今一併官為計畫諸事俱得實濟至
兵丁駐防日久零星逋欠自所必有然屢經盤剝
其息亦足敷本此時既當起程自不應任需索之
人滯留滋擾其中辦理亦應官為主持示之節制
將來起程仍應按時分作三起行走途次雖有本
旗管押官員即經過地方亦必有員役料理而該
將軍巴祿副都統勒克興長等尤當專任其責直
至伊犁方為奉職竣事倘兵丁等途間或不安靜

及有乘間逃回情事伊三人不能辭咎逃而不獲則罪在楊應琚其孥獲者一面正法一面即行奏聞

甲寅

命回城輪班入

覲人員酌定品級年額

上諭軍機大臣曰永貴等奏稱回部六品以上伯克等四班俱經入覲今年應再從第一班起但伊等

俱係已經瞻仰之人而四班尚有留辦事務及因疾未行者向來入覲約以四十員為率請先儘此項人員其第一班再行入覲者可以酌減等語六品以上伯克等既俱經入覲嗣後亦不必太煩著將四品以上之伯克等以四年一次分班五品以下不必入班或有新經除授者准其前來每年不過二十員以別等威而示體恤

丙辰

伊犁將軍明瑞等疏奏籌議安插駐防兵丁事宜

明瑞等奏言臣等准軍機處議覆伊犁駐劄索倫察哈爾及涼州莊浪滿洲兵陸續派往以便建造城署營房及預備糧餉等事宜查察哈爾厄魯特兵丁俱以游牧為生應仍其舊索倫亦係游牧過冬自構棚房可以臨時酌辦其給與產業再行詳議至涼州莊浪官兵若照該處給

與房屋即需七十餘間須擇地土堅凝及便運
木植之處今烏哈爾里克新城僅敷現在官兵
駐劄惟近城三四十里伊犁河岸高阜之上可
築大城所用木植有阿布喇勒山松杉甚多預
行斫伐從哈什空格斯等河造筏直至城工對
岸且在新城及固勒扎回城之間糧運亦便地
既產煤又採柳條蘆葦柴薪不乏來春從內地
調綠旗兵一千名築城造房至秋季可成三千

餘官兵房舍之半其餘至乾隆乙酉年可竣此
時先派伊犁馬兵數百游牧至阿布喇勒山伐
木造筏一面咨行楊應琚遣木工鐵工數人於
今秋製造器具秋收後以綠旗兵協助煎製蘆
蓆麻繩可以應用無悞其兵丁糧餉以伊犁牧
獲及回人所交糧石計至乾隆丙戌年約十七
萬石有奇至乾隆丁亥年麥收之前合計新舊
兵丁二萬口足敷三年之食但駐防糧餉須多

為籌備請以來年為始先增屯田兵五百名乾隆乙酉年城工竣事又增兵一千名歸入屯田收穫自有盈餘且孳生牛羊尚未算入將來塔爾巴噶台駐兵亦可源源接濟謹將本年二月起至乾隆丁亥年止陸續前來官兵及收支糧餉各數分晰列單恭呈

御覽奏入得

旨如所議行

平定軍家編方書

平定軍家編方書

二十九

平定準噶爾方略續編卷二十

欽定四庫全書

平定準噶爾方略續編卷二十一

乾隆二十八年三月戊午朔

葉爾羌辦事尚書都統新柱等疏奏拔達克山素勒坦沙獻波羅泥都屍骸及其妻子

新柱等奏言臣等節次欽奉

諭旨辦理拔達克山素勒坦沙及霍罕額爾德尼伯克之事隨於正月十七日據派往拔達克山之

薩里阿布拉三等呈稱工年十二月十九日至
拔達克山將所奉訪聞波羅泥都屍骸潛瘞於
牌租阿巴特及寄書素勒坦沙速令呈獻等情
節再三開導素勒坦沙於二十三日遣密爾咱
阿達里卜等到埋瘞波羅泥都屍骸處所眼
同掘出併將伊妻一名珠賚哈係回人生子和
卓阿斯瑪一名巴特瑪係厄魯特人生子阿卜
都哈里克一名額爾克揚係布魯特人生子和

卓巴哈敦俱全行查交又照看伊等之摩羅密爾努魯斯摩羅巴喇特等九名口情願隨來內地遂於二十六日起程等語查散秩大臣阿奇木之姊濟爾噶勒係波羅泥都屬人波羅泥都之妻俱係素識本年正月二十五日臣等將波羅泥都之妻三人令濟爾噶勒及葉爾羌舊伯克等識認僉稱確實又詰問密爾咱阿達里卜云從前素勒坦沙曾言波羅泥都之屍係伊親

隨伊里雅斯等盜往理都斯塔爾罕部落埋於
伊瑪瑪拉今從拔達克山牌祖阿巴特掘出恐
未確實據稱前將軍等索取時未知盜去原委
是以不能查出續因和卓木幼女身故前往埋
葬其時正值貿易聚集之期凡波羅泥都舊屬
俱於是夜潛往祭奠我等俱經目擊此次掘屍
時因摩羅巴喇特不肯直供經薩里等持刀欲
殺始指掘一幼女之屍復行嚴訊往掘凡舊隨

波羅泥都人等意俱慘沮等語臣等伏思波羅
泥都負

思叛逆部滅身亡其屍骸妻子雖無關輕重但有此
餘孽仍留回部保無借端滋事搖惑衆心以致
善良被擾今全行獻出回人共見共聞邊陲益
為寧帖臣等不勝慶幸謹將逆屍盛匣封固及
其妻子屬人派員一同解送再素勒坦沙恭進
表文及致臣等書信謹一併進呈

御覽奏入得

旨下部知之尋繹出所進表文云拔達克山伯克臣
素勒坦沙謹奏請

聖鑒自為臣僕受

大皇帝深恩實出衆伯克之上今布哈爾烏蘇伯克
等皆以臣殺害波羅泥都霍集占等結怨興兵
臣雖勉力支持然別無可倚賴所幸為

大皇帝臣僕實心効力整頓部落即身故之日亦必

囑咐子孫無改臣在日恭順至臣地所埋波羅
泥都屍骸及其妻子僕人蒙葉爾羌駐劄大臣
等遣使查取臣不敢遲悞即遣臣親隨密爾咱
阿達里卜等呈獻并令入覲

天顏謹奏

命議敘葉爾羌辦事尚書都統新柱等及辦理齊特
喇爾事宜

工諭軍機大臣曰新柱等奏稱素勒坦沙呈獻波羅

泥都屍骸及其妻子遣使入覲惟伊侵掠之齊特喇爾尚在致書自辨未即付還仍行嚴飭令薩里等同密爾咱阿達里卜前往等語新柱額敏和卓所辨拔達克山事宜甚屬妥協著交部議敘仍各賞御用荷包鼻煙壺薩里等著賞給緞疋以示鼓勵覽傳至素勒坦沙書詞稍覺嚴厲伊進表致書頗屬恭順此次往問侵掠齊特喇爾之事應加以撫慰但業已發行亦自無礙若素勒坦沙盡還侵

掠固善其或尚有遲疑推托亦不必遽示兵威即
作速奏聞候旨

庚申

命吐魯番郡王額敏和卓暫留葉爾羌辦事

上諭軍機大臣曰前命玉素富往代額敏和卓因有
辦理拔達克山事宜仍令暫留葉爾羌今素勒坦
沙既將波羅泥都屍骸及其妻子獻出則額敏和
卓原可遵諭起程但現在索還侵掠齊特喇爾游

牧又遣薩里等前往拔達克山額敏和卓不若俟
此事辦理妥協後再回吐魯番休息著傳諭額敏
和卓及玉素富知之

辛未

命議敘帶領察哈爾兵丁之侍衛齊里克特納旺等
工諭軍機大臣曰齊里克特納旺奏稱帶領挈眷駐
防之察哈爾兵丁已抵烏魯木齊等語齊里克特
納旺照管妥協著交部議敘

命以原任副都統佟福柱為三等待衛仍留烏魯木
齊効力

工諭軍機大臣曰旌額理等奏稱原任副都統佟福
柱自到烏魯木齊以來頗知奮勉今三年期滿又
懇請多留數年効力應請再留二年等語佟福柱
著加恩授為三等待衛仍留烏魯木齊効力行走

壬申

喀什噶爾辦事尚書永貴等疏奏霍罕額爾德

尼伯克查還阿濟比土地戶口

永貴等奏言二月十五日據差往霍罕之員外郎陀穆齊圖侍衛兼庫納伊沙噶伯克阿卜都喇伊木等報稱遣人將額德格訥阿濟比所告鄂斯地方為霍罕額爾德尼所據奉委行文申飭令其查還隨經面見額爾德尼開陳利害詳悉曉示額爾德尼聽從即將額德格訥之原駐鄂斯等處屯種水利全行讓還又令安集延之

阿奇木伯克隨同起程面見阿濟比指給并具
有呈文頗為恭順等語臣等擬俟托穆齊圖等
回至喀什噶爾詳詢情節謹將遣使霍罕情形
先行馳奏並咨會明瑞新柱等一體酌量辦理
奏入報

聞

癸酉

訓諭叅贊大臣納世通辦理外藩事宜

上諭軍機大臣曰永貴等奏稱挖穆齊圖等前往霍罕以利害曉示額爾德尼伯克即謹遵約束將所侵阿濟比之鄂斯等處交還指給等語額爾德尼伯克頗屬恭順伊將來若常能如此可以永荷朕恩著納世通傳諭伊來使等知之再納世通在京奏對曾有永貴新柱等所辦拔達克山霍罕事體稍覺過當之語今看伊等辦理如此妥協可見駕馭外藩若一味姑息伊等必至驕肆自當恩威並

用俾先知所懼則其感益深足以預弭滋事之端
并傳諭納世通伊至喀什噶爾時遇此等事當慎
持大體加意辦理不可苟且塞責

命獎賞拔達克山伯克素勒坦沙

上諭軍機大臣曰素勒坦沙遵奉傳飭送出波羅泥
都屍骸及其妻子所進奏章頗為恭順朕深嘉悅
著加恩賞素勒坦沙緞八端交伊使賚往并著新
柱納世通等將朕鑒悉素勒坦沙悃忱加恩賞賚

金史紀事本末卷二十一
之處傳諭知之

丁丑

諭葉爾羌辦事尚書都統新柱等俟辦理齊特喇爾
事竣交代回京

工諭軍機大臣曰新柱久駐葉爾羌應派員更換著
副都統額爾景額從容由驛前往此時新柱有遣
使拔達克山索取齊特喇爾游牧一事若素勒坦
沙遵約查還新柱即與額爾景額交代起程其或

仍有候辦情形新柱仍暫行駐劄會同商辦

議伊犁挈眷索倫察哈爾兵丁事宜

伊犁將軍明瑞等奏言欽奉

諭旨派出索倫察哈爾兵丁挈眷移駐伊犁所有給
與產業預備牲隻口糧等項謹分列五條會奏
請

旨一索倫察哈爾兵二千名挈眷移駐伊犁除帶來
馬駝准其存留外仍應給與孳生牲隻請按現

在牛羊數目每戶派給羊二十五隻二三戶合
給牛一隻每羊十隻歲交孳生羊三隻牛十隻
交孳生牛二隻其採買辦送候定議遵行一兵
丁至伊犁後應支鹽菜銀兩一年屆滿即行停
給惟支舊額錢糧兼賞給籽種令其開墾地畝
收穫之前仍准給與口糧一伊犁現有遷移察
哈爾厄魯特兵共一千八百名應分為二昂吉
舊有厄魯特兵千餘名應作一昂吉各設總管

副總管佐領驍騎校等官每佐領下領催四名
所轄以二百人為率其實授官員不敷以領催
委署一察哈爾厄魯特既編設昂吉補授官員
一切辦理案件應賞給關防鈐記以昭信守一
厄魯特兵千餘名食餉者僅一百二十名伊等
有前隨將軍等進兵効力者有自布魯特哈薩
克來投者請再增食餉兵八十名合之察哈爾
兵丁共為二千名以符餉額奏入得

旨軍機大臣議奏尋議查辦給索倫察哈爾等牛羊
以裕生計其孳生定額應如所奏辦理除伊犁
現存羊隻外已議令巴爾品於牧羣辦送四萬
隻又成裘扎布奏現有牛五百八十隻及喀爾
喀折抵應交馬匹計牛四千隻來年可抵伊犁
其鹽菜銀兩一年內應准支給收獲以前口糧
大口日給八合三勺小口減半至所議編設昂
吉補授官員俱按照該處情形其索倫兵一千

名與察哈爾事同一體均請如所奏辦理仍給
與總管昂吉關防佐領鈐記擬定字樣交禮部
鑄給再厄魯特等兵丁食餉者少亦應增加以
示鼓勵奏入

工從之

癸未

命核定隨征及駐守各兵丁脫逃之例

上諭大學士曰向來出征兵丁有自中途及軍營逃

回者即與正法所以懲逗撓肅軍紀也若各省營兵在伍脫逃舊例拏獲之日不過除去軍籍加之重杖蓋其情本輕則罪亦薄惟派往伊犁等處換防屯田兵丁較之身列行陣者雖有不同而新疆駐守攸關又與尋常營伍食糧初逃未攜軍器者有間繩以軍法固覺過嚴若僅照營兵之例子以責革亦不足以示儆前次所定條例殊未周晰著該部將出征及在伍脫逃二項并派往新疆駐守

兵丁遇有脫逃應作何分核情罪輕重之處詳悉
定議具奏尋議臣等查隨征兵丁有自中途及軍
營脫逃者擬斬立決應仍照舊例外其派往新
疆駐防種地之滿漢各兵遇有脫逃應請於緝
獲日發遣原派地方枷責遊營充當苦差十年
無過該將軍等查明具奏准回旗籍再犯者立
行正法至京外在伍綠營兵丁脫逃原律或杖
九十或杖八十亦未畫一應無論京外俱杖一

百初號一月永遠不准入伍其在京八旗及各
省駐防兵脫逃俱仍照舊例辦理奏入

上從之

丙戌

命伊犁屯田厄魯特等照常酌給籽種

上諭軍機大臣曰明瑞等奏稱伊犁屯田之厄魯特
等已給與籽種二百三十石請核計來歲收穫以
前食用需糧若干若所餘足敷本年籽種即停其

官給等語厄魯特等甫經安插生計未裕不便停
給籽種著傳諭明瑞等來年播種之時照常官為
給發

夏四月戊子朔

以徇庇叅員哈尚德

訓飭巴里坤辦事原任巡撫鐘音等

工諭軍機大臣曰據鐘音等奏參革副將哈尚德應
賠倒斃羊隻尚欠銀一萬二千九十餘兩將伊初

號嚴催至五年之久又分釐未完請交部嚴審一
并行查原籍照例辦理等語哈尚德屢經獲罪朕
加恩寬宥用至總兵伊又以婪贓革職仍賞給副
將職銜効力乃解送羊隻全不經意照管至倒斃
一萬五千餘隻之多即應重治其罪朕尚恐購辦
官員以疲瘦充數致有屈抑特命黃廷桂行查據
奏此項羊隻俱係伊揀選收領始令革職枷號賠
補力不能完即永遠枷號亦所應得今鐘音等奏

請解部審理不思解部之後該部又將加之刑訊
耶若訊無欺隱情節即將伊正法耶此特欲設法
送回大概出鐘音之意鐘音歷任巡撫凡事苟且
因循乃駐劄巴里坤以來一味沽名今又徇庇哈
尚德濫行具奏甚屬不合溫敏隨同附和亦屬非
是著將哈尚德未完銀一萬二千九十餘兩令鐘
音賠補八千兩溫敏賠補二千兩其二千餘兩仍
令哈尚德賠補

已丑

諭陝甘總督楊應琚等查勘貯備火藥及採辦硝磺

事宜

工諭軍機大臣曰鐘音奏現在巴里坤所餘火藥二萬四千餘觔據提督五福咨明楊應琚定議駐防巴里坤中左右三營預備三年火藥即於巴里坤現存火藥內支取已全交五福以備兵丁操演等語此項火藥從前楊應琚照部議存貯備用而鐘

音又云支取以備操演所奏殊未明晰邊陲要地
儲備火藥自應充裕此項既供操演又將以何項
為儲備耶著傳諭楊應琚等查明據實具奏再巴
里坤移駐提督需用火藥較多其附近處所有無
出產硝磺足資採辦者該督等可彼此咨商廣為
察勘以省內地輓運之煩并傳諭該督撫提督等
知之

議駐防索倫兵丁中途換給馬駝事宜

伊犁將軍明瑞等奏言臣等准軍機處議掣眷
駐防之索倫察哈爾兵抵伊犁時將乘騎馬駝
即給為產業查索倫等處距伊犁甚遠原來乘
騎不無倒斃應請將索倫兵一千名抵烏里雅
蘇台時交成衮扎布派員照看原來馬匹有疲
乏者即行易換庶程途無滯於伊犁生計亦屬
有益奏入得

旨軍機大臣議奏尋議索倫察哈爾掣眷兵丁道路

遠近不同辦理自難畫一今明瑞奏請索倫兵
至烏里雅蘇台換易馬駝既可遠行無滯而分
給為業亦有益生計但當視其原來牝牡照數
酌換其所留疲乏馬駝又可牧放備用奏入

上從之

癸巳

命酌派西安滿洲蒙古兵丁移駐涼州莊浪

上諭大學士曰涼州莊浪駐防滿洲兵丁二千二百

餘戶現在移駐伊犁涼州莊浪雖係內地不必定
設駐防但係西陲要路其城署營房俱修葺未久
竟令空間頽廢於觀瞻未協且西安官兵駐防已
久生齒日繁若酌量移駐於伊等生計亦有裨益
著派西安滿洲兵丁二千名駐劄涼州莊浪兵數
無多不必仍設將軍管轄涼州留一副都統莊浪
設一城守尉足矣其移駐事宜著楊應琚嵩椿定
議具奏

丁酉

命議敘獎賞喀什噶爾辦事尚書都統永貴等及辦

理霍罕事宜

上諭軍機大臣曰永貴等奏挖穆齊圖等向霍罕額爾德尼索還所侵阿濟比之鄂斯等處額爾德尼即遵約付還等語永貴伊勒圖辦理妥協著加恩交部議敘員外郎挖穆齊圖侍衛隸庫納亦著議敘同往之伯克阿卜都喇伊木著酌量獎賞敘足

又

諭曰永貴等奏稱聞得愛烏罕遣賽特伯克來霍罕
問額爾德尼內附情事額爾德尼亦遣使往報不
可無疑應留心訪察詢問等語額爾德尼係外藩
新附之人不知內地法度且隣邦通使亦伊等來
往之常無庸深究果有結連愛烏罕窺伺回部情
形必難掩覆原可直截辦理此時預為意料於事
無益著傳諭永貴等知之

喀什噶爾辦事尚書都統永貴等疏奏新城房屋工竣

永貴等奏言臣等奏派楊寧固世衡於賽爾們
修建新城工竣後將舊城官房拆卸及回人捐
備木料興工修造於本年三月全行告竣合計
七百餘間所用銀兩在收稅項下動撥造冊送
部請銷其加給工役口糧即用收放盈餘糧石
再附近所有水泉冬季枯涸惟以池塘接濟殊

覺不便臣等令於城內西北角試行掘井幸獲
泉脈其味頗甘現在修砌以供汲飲官兵回人
無不歡幸奏入報

聞

戊申

諭伊犁將軍明瑞等酌定撤回官兵道路事宜

工諭軍機大臣曰明瑞等奏稱葉爾羌應撤之索倫
兵若於八九月起程自當在伊犁過冬或夏令即

已過行則度車克納克嶺由朱爾都斯一路經過
烏魯木齊至烏里雅蘇台回抵游牧已行文新柱
海明旌額里等語各回城撤回索倫察哈爾兵由
伊拉里克至烏魯木齊路多戈壁故皆於伊犁過
冬今明瑞等所奏係從阿克蘇以東赫色勒河上
游過嶺水草頗饒道路亦近嗣後撤回之索倫察
哈爾官兵若值有水草之時自當行走此地即起
程稍遲亦不必往伊犁過冬現在各城有積貯糧

石隨其所至足資憩息並當取道於此以免紆迴
著傳諭明瑞及各駐劄大臣等知之

陝甘總督楊應琚疏奏駐劄烏魯木齊酌請改
設總兵官事宜

楊應琚奏言查烏魯木齊為新疆衝要之區現
在召募內地貧民攜眷開墾又設副將一員酌
分安西提標前後二營及各標情願挈眷前往
兵丁共一千八百餘名而原議駐兵四千名尚

須陸續調撥查各省營制每營轄兵不過數百
名經該處辦事大臣旌額理訥蘇懇與臣往復
扎商擬再設一營以符體制規模既大似副將
一員不足以資統轄應請改為總兵添設鎮標
中營及城守營合原設之左右二營共成四營
統聽巴里坤提督節制將來烏魯木齊以東巴
里坤以西應行屯種之處其綠旗官兵即責成
總兵就近督率辦理而巴里坤提臣東有哈密

沙州西有烏魯木齊居中調度形勢允合如蒙
俞允所設總兵另行請

旨補授其添設二營之將備千把外委各官即於陝
甘二省閒僻營分酌量移改續議具奏奏入得
旨如所請行

五月己未

命送厄魯特台吉巴朗歸都爾伯特游牧

上諭軍機大臣曰明瑞等奏哈薩克來投之厄魯特

台吉巴朗交侍衛永平送京或安插京城或在伊
母舅策凌烏巴什游牧居住等語巴朗既係策凌
烏巴什之甥即著在彼處游牧居住不必送京

癸亥

議核銷伊犁牲隻事宜

伊犁將軍明瑞等奏言伊犁烏魯木齊俱有屯
田其牲隻奏銷事同一例所有每年倒斃之數
馬騾驢准銷三分牛准銷一分五釐踰額者著

落賠補其牧放驢馬及作為口糧之牛隻每百
准銷六分至口糧羊隻除孳生者交官外似尚
有盈餘可補應不准其倒斃備用駝隻雖不便
照軍臺准銷三分之例應請每年開銷一分踰
額亦著落賠補奏入得

旨軍機大臣議奏尋議從前烏魯木齊核銷倒斃牲
隻各屬開報不符部議准以每百八釐開銷本
年二月旌額理等奏稱散牧水草之牲隻與飼

秣者不同請將馬騾驢每年准銷三分牛准銷一分五釐今明瑞所奏相符應准其照數核銷其牧放之羊及備用駝隻俱如所奏辦理奏入上從之

乙丑

諭陝甘總督楊應琚等籌畫營伍兼併添設事宜

工諭軍機大臣曰鄂弼奏查閱營伍一摺內稱各標營額設弁兵有分派防守及調任新疆屯田之事

而副將叅將遊擊都司守備等亦多係遞行委署之員不能實力訓練等語前此有事西陲自必調撥官兵以濟急用今駐防屯田規模大定則內地營伍亦應加意整頓鄂弼所奏情形亦前此有不能兼顧之勢可不必深究但西安如此則甘肅可知倘仍不為整頓將來漸至廢弛著傳諭楊應琚鄂弼將各該標營現在情形悉心體察或有應行兼併管轄及另議添設之處務收實用不必稍存

擗節之見俱著詳議具奏

丙寅

命回城需用馬匹由伊犁等處調撥

上諭軍機大臣曰永貴等奏稱喀什噶爾購馬二百七十九匹用銀二千七百六十三兩有奇計每匹銀十兩以內等語伊犁烏魯木齊貿易哈薩克馬匹甚多嗣後各回城有需馬之處俱著奏請調撥停其購買馬匹

喀什噶爾辦事尚書都統永貴等疏奏興修水利事宜

永貴等奏言回部地畝俱收資於溝渠據伯克噶岱默特稟稱灌溉全部地畝之河一名赫色勒河出喀什噶爾之西喀什噶爾山中灌溉東南一帶托古斯恰特賽爾們喀什噶爾哈喇刻爾多羅特巴克阿爾巴特牌租阿巴特等大小村莊過巴爾楚克歸於羅卜淖爾一名托庸河出

喀什噶爾西北托庸山中灌溉東南玉斯屯阿
喇圖什阿喇古霍爾干阿斯騰阿喇圖什伯什
克勒木等大小村莊與赫色勒河合流過巴爾
楚克一名圖巴里克河出喀什噶爾西南吉斯
嶺及西邊烏帕勒山中東流會於圖捫此河上
流向東浚渠引水灌溉汗河里克提斯袞赫色
勒布伊等三村莊下流向東北與赫色勒河合
流過巴爾楚克俱滙於羅卜淖爾一名庫森提

斯袞河出喀什噶爾西南英噶薩爾城西羌理
山中灌溉東北英噶薩爾之各村地畝散流於
戈壁惟赫色勒布伊提斯袞汗阿里克三處分
引圖巴里克一河水不足用臣等詳加相度自
赫色勒河東南浚渠四十餘里引水入赫色勒
布伊村又托庸河水湍急所種地畝多被衝刷
臣等酌派伯克等添建土石堤壩并鑿山石以
弱水勢仍飭令時加修葺保固期收實效奏入

報

聞

壬申

議補授回城伯克事宜

軍機大臣奏言據永貴等議奏回部伯克有應
行請

旨調補及由各本城奏補一摺欽奉

諭旨交臣等議奏查工年三月奉

旨嗣後伯克等有陞遷降革等事五品以上著各該大臣專摺具奏六品以下著年終彙奏本年正月奉

旨六品以下小伯克擬定正陪具奏補放其各城之阿奇木等缺出將應放之人列名具題俱著有定例至大城阿奇木等向由各城調補其小伯克等即坐補本城之缺所以別等威而示體恤查所奏喀什噶爾葉爾羌阿克蘇和闐烏什庫車

沙雅爾庫爾勒玉古爾英噶薩爾塞里木拜哈
喇哈什克勒底雅塔克玉隴哈什齊爾拉等城
之三四品阿奇木伊沙噶伯克缺出開列具奏
及六品以下之伯克等年終彙奏俱無庸另議
其喀什噶爾所屬之牌租阿巴特塔什密里克
阿斯騰阿喇圖什葉爾羌所屬之巴爾楚克阿
克蘇所屬之克勒品烏什所屬之魯克察克托
克三喀喇和卓闢展洋赫等城村之阿奇木伯

克十四員雖係四五品俱歸大城兼管不必將
各城會同調補應即坐補本處員缺惟沙爾呼
勒奇盤二城地處邊遠山僻其阿奇木等仍由
本處揀補餘俱照各城辦理奏入

工從之

丙戌

命副都統額爾景額往葉爾羌辦事

上諭軍機大臣曰副都統額爾景額派往葉爾羌辦

事照納世通之例授為叅贊大臣

喀什噶爾辦事尚書都統永貴等疏奏阿克蘇
伊沙噶伯克頗拉特不職請革任解京

永貴等奏言阿克蘇伊沙噶伯克頗拉特賦性
愚拗素與阿奇木色梯巴勒氏不和遇事每多
掣肘臣等屢戒不悛今據所屬回人呈告頗拉
特隱匿巴林回人九十戶未辦差糧等語臣等
飭查屬實又伊子七品都管伯克梯尼恃勢強

占回人田地馬匹俱經呈告臣等齊集大小伯克摘取頗拉特梯尼頂翎并將伊應帶戶口交派侍衛駝騎校等解送京師其頗拉特員缺查齊里木伊沙噶伯克密爾頗拉特人明白辦事奮勉應請調署阿克蘇伊沙噶伯克事務伊子員缺一併揀選補放年終彙奏奏入報

聞

平定準噶爾方略續編卷二十一

欽定四庫全書

史部

平定準噶爾方略續編卷二十三
五

詳校官監察御史臣孫家賢

通政使司副使臣莫瞻菴覆勘

總校官進士臣

朱鈐

校對官修撰臣

戴衢亨

騰錄監生臣

蔣知廉

欽定四庫全書

平定準噶爾方略續編卷二十二

乾隆二十八年六月庚寅

命議敘陞賞葉爾羌辦事尚書都統新柱等

新柱等奏言臣等前遣伯克薩里等前往拔達

克山索取搶掠齊特喇爾戶口什物五月初七

日據報三月初四日抵拔達克山將飭交素勒

坦沙文書傳示素勒坦沙告稱從前與鄰部多

有爭鬪之事自為

大皇帝臣僕因得安靜至齊特喇爾原係我先世舊游牧今將軍大臣等既不准我管轄即遵飭將我弟沙卜多爾噶達爾撤回將該地方戶口什物查還旋據素勒坦沙將戶口牛羊什物盡行查出并派伊所屬伯克海蘭達爾等前往博洛爾逐一交還奏入

工諭軍機大臣曰新柱等奏稱伯克薩里等往諭拔

達克山素勒坦沙即凜遵約束將伊弟從齊特喇爾撤回其所掠人口牲隻什物俱查明交還等語新柱額敏和卓辦理妥協著交部議敘仍賞大小荷包一對鼻烟壺各一枚薩里阿布拉三甚屬効力薩里著賞三等輕車都尉世職阿奇木缺出列名請補仍賞緞六端阿布拉三於應陞處列名仍賞緞三端素勒坦沙甚屬恭順著先賞大小荷包鼻烟壺仍將葉爾羌庫貯之緞賞給十二端並傳

朕嘉悅施恩之意令其知悉

辛卯

諭葉爾羌辦事大臣等更換駐劄事宜

上諭軍機大臣曰前派額爾景額更換新柱回京適
新柱有遣使拔達克山一事因傳諭令其稍待今
素勒坦沙既獻波羅泥都屍骸及其妻子又查還
齊特喇爾土地戶口是事已完竣新柱俟額爾景
額抵葉爾羌即起程回京再額敏和卓駐劄年久

已派玉素富前往更換亦因拔達克山之事暫留
令玉素富在阿克蘇辦事此時額敏和卓亦應起
程但額爾景額甫經受事額敏和卓仍留住三月
再行文玉素富赴葉爾羌更換俱著傳諭知之

癸巳

命鑄給伊犁四昂吉總管佐領等關防鈐記

上諭軍機大臣曰明瑞等奏現在伊犁駐防及陸續
添駐之索倫察哈爾厄魯特兵丁分為四昂吉每

昂吉設總管一員佐領六員應照例鑄給關防鈐記以昭信守謹擬定字樣請旨等語著交該部照明瑞所定字樣兼清漠托忒回字成造關防鈐記頒發

伊犁將軍明瑞等疏奏回城換班官兵道路程
期

明瑞等奏言查軍機處議覆新柱等所奏回城
駐劄兵丁換班之期計正月初自京起程四月

至哈密六月可抵葉爾羌等城查四月間哈密
水草始生相距數千里斷不能六月即至明瑞
去年曾領伊犁換班兵丁向巴里坤行走請交
令會議具奏等語臣等查自哈密經由闕展阿
克蘇至葉爾羌等處地多戈壁是以去年換班
兵丁由巴里坤朱爾都斯一路水草日漸豐美
可以牧放牲隻緩程前進不必冒暑過行而撤
回兵丁係冬季起程雖行戈壁正當雪盛不患

無水亦於人馬有益奏入報

聞

癸卯

議酌量移派哈喇沙爾兵丁事宜

軍機大臣奏言欽奉

諭旨哈喇沙爾屯田較少現在綠旗兵何以仍有八
百名臣等查乾隆二十七年永貴奏定回城綠
旗兵於哈喇沙爾議以東至關展西至庫車相

距千里又有魯克察克吐魯番喀喇和卓托克
三庫爾勒玉古爾等城回人居住供應往來差
務請將該處原有兵丁仍舊存留當經臣等覆
准但該城差務雖繁而近來辦理已有章程所
留兵丁自可量為裁撤派往烏魯木齊屯田其
實應留駐若干令達桑阿酌量辦理奏入報

聞

丙午

以

乾清門二等侍衛舒常等護送霍罕使人任意自

便

命降等示罰有差

上諭軍機大臣曰納世通奏稱乾清門侍衛舒常鄂
蘭護送霍罕額爾德尼伯克使人行走並不照管
同行於數日前先已起程致來使所僱車役潛逃
請將舒常等交部嚴加議處等語所奏甚是舒常

鄂蘭係乾清門行走之員特派前往加意照看外
藩使人乃任意自便先期行走以致夫役潛逃成
何體制舒常著降為三等侍衛鄂蘭著降為藍翎
侍衛不准在乾清門行走應更換時著再留一年

乙卯

命更調喀什噶爾等城辦事之總兵侍衛等

上諭軍機大臣曰永貴等奏稱喀什噶爾為總辦回
部事務之地向係托穆齊圖辦理續調英噶薩爾

總兵額僧額協辦今托穆齊圖進京惟額僧額一人辦事而奉派總兵台布恐不如額僧額之熟悉請即調赴英噶薩爾辦事又駐劄賽里木拜之原任察哈爾總管袞布策凌不甚諳練請將英噶薩爾侍衛伊凌阿調往辦事等語額僧額著仍駐劄什噶爾辦事台布著調往英噶薩爾辦事伊凌阿著調往賽里木拜辦事

秋七月丁巳

命留涼州莊浪官兵滋生銀兩於本處備賞

上諭軍機大臣曰明瑞奏涼州莊浪移駐伊犁官兵
仍領滋生紅白賞銀一摺現在移駐官兵籌辦業
已豐裕毋庸再議賞給今西安官兵陸續移駐涼
州莊浪著傳諭楊應琚將此項滋生銀兩留存該
處俟官兵等移駐涼州莊浪後即作伊等紅白賞
賚之用

己未

諭闡展辦事郎中德爾格等查辦餘糧出糶事宜

工諭軍機大臣曰據德爾格奏稱闡展屯田所收穀

石自二十六年十一月起至本年三月止共糶銀

二萬八千兩有奇本年六月又糶銀一萬二千三

百兩有奇已歸入正項動撥等語闡展屯田收穫

夫給官兵外仍節次盈餘至四萬餘兩辦理甚善

若增兵開墾糶價充公可省內地解費殊為有益

但該處屯田無多又經裁撤兵丁何以有餘若此

著傳諭德爾格所餘穀石作何出糶之法收獲再
多俱能如此出糶否派兵增墾尚可容若干人即
查明具奏再烏魯木齊屯田多而商賈衆哈喇沙
爾亦有屯田若能照闢展出糶更善併傳諭旌額
理達桑阿知之

命以伯克薩里為阿克蘇伊沙噶伯克

上諭軍機大臣曰新柱等奏稱伯克薩里此次前往
拔達克山索取齊特喇爾地土人戶甚屬奮勉現

在阿克蘇伊沙噶伯克頗拉特解任請以薩里補授其隨往之阿布拉三亦請賞給緞疋等語新柱等昨將拔達克山遵檄送還侵掠一事具奏已賞給薩里世職阿布拉三緞疋薩里著照所請補授阿克蘇伊沙噶伯克阿布拉三仍遵旨記名陞用命獎諭拔達克山素勒坦沙並准博洛爾使人入覲

工諭軍機大臣曰新柱等奏稱往諭拔達克山素勒

坦沙即將所掠齊特喇爾土地戶口什物俱已交
還但從前強詞飾辨仍有應得之罪現將來使暫
留葉爾羌候旨遵行再博洛爾頭目沙瑚沙默特
因所屬復還故地感激天恩遣使奏謝可否准其
入覲等語素勒坦沙因大臣等檄責強詞飾辨乃
外藩初附未諳體制及薩里往諭即凜遵約束尚
屬恭順不必深究昨已加恩賞賜即著來使齎回
至沙瑚沙默特遣使謝恩著准其隨同本年輪班

入覲之伯克等前來俱著傳諭知之

庚申

以護軍叅領宗室松年騷擾驛站

命革職於肅州永遠圈禁

上諭大學士曰據楊應琚等奏平涼等州縣稟報護軍叅領宗室松年沿途需索銀兩不遂踢傷管號家人等語松年由新疆奉差回程輒敢騷擾驛站到處需索并踢打州縣家人賒欠紬緞價值種種

肆行無忌殊屬不堪該督撫據實叅奏即將松年
留肅候旨所辦甚是松年著革職此等不法之員
本應永遠枷號示衆但宗室向無枷號之例著即
在肅州永遠圈禁不得令其出入凡有一切差遣
過肅官員即令往視并曉諭伊等松年沿途騷擾
勒索因係宗室僅予革職圈禁若常人有似此者
定行永遠枷禁俾往來奉差人員觸目警心共知
省惕

癸亥

申諭伊犁將軍明瑞等嚴禁外藩越境游牧

上諭軍機大臣曰據永貴等奏稱住居吹地烏瓦克
部落之阿哈拉克齊雅納什拜年近七十率伊子
愛圖干等告稱向未經行回地因向慕天朝威德
幸及此身尚存特來瞻仰并呈獻馬匹已賞緞遣
回等語吹塔拉斯沙喇孛勒俱在伊犁以西此吹
地未知即附近塔拉斯之吹否若果即其地原係

厄魯特游牧我師平定準夷後駐兵伊犁恐地方
遼濶或有右哈薩克布魯特潛來厄魯特境內游
牧亦未可定前阿桂明瑞等於塔爾巴噶台等處
雖加意巡查其吹阿勒和碩尚未前往著傳諭明
瑞等酌派人員率同熟諳地理之厄魯特前往吹
塔拉斯阿勒和碩沙喇孛勒等處巡查若哈薩克
布魯特等仍有越境游牧者即曉示該頭目速行
驅逐不可令伊等闖入內地

甲戌

命查詢內地及回部存留厄魯特婦女願售者送往

伊犁

上諭軍機大臣曰明瑞等奏稱從哈薩克投來伊犁之厄魯特壯丁六百餘名並無妻室現在察哈爾厄魯特等婦女甚少若將內地綠旗兵等俘獲售買及回地所有婦女等贖出順便送往伊犁可以酌量給配等語伊犁厄魯特等已編設昂吉佐領

若壯丁多係鰥居非長久之道著傳諭楊應琚除
內地綠旗兵等所得厄魯特婦女已經匹配外其
但供役使者如年少方壯酌量擇取給價贖出送
往伊犁即或已經匹配情願轉售亦聽其便毋得
稍涉勉強至回部厄魯特婦女頗多從前阿桂等
雖行文各城給價贖取並未視為要務并著傳諭
駐劄大臣與該伯克等會商加意辦理

辛巳

陝甘總督楊應琚疏奏挈眷移駐烏魯木齊兵
丁起程日期

楊應琚奏言查烏魯木齊應駐挈眷兵丁四千
名除現在移駐一千八百餘名尚須兵二千一
百餘名業經移行陝甘提鎮查詢派撥又准旌
額理咨所造兵房一千二百間七月內可竣足
敷居住臣復行查詢據甘肅提標及涼肅二鎮
所屬挈眷兵丁及家口共六百五十餘名先後

抵肅於本月初十日起程其續行查送者俱照
例辦理奏入報

聞

癸未

諭伊犁將軍明瑞等巡查特穆爾圖淖爾事宜

上諭軍機大臣曰據圖爾炳阿等奏稱布魯特人等
帶有馬匹羊隻前來烏什貿易內有哈薩克三人
告稱原在西喇蘇游牧今移於楚穆訥爾等語看

來哈薩克等同布魯特來烏什貿易恐伊等至特
穆爾圖淖爾游牧昨諭明瑞等派員前往伊犁以
西吹塔拉斯等處巡查若有哈薩克布魯特等偷
越游牧即行驅逐今特穆爾圖淖爾亦應一體巡
查至此次貿易哈薩克等所移之地是否厄魯特
界內亦著查詢具奏

甲申

喀什噶爾辦事尚書都統永貴等疏奏各城派

往伊犁屯田回人足額情形

永貴等奏言查續派各城回人往伊犁屯田一事臣等於各城詢問選擇約以一千五百名為率阿克蘇迤西委伯克木薩迤東委鄂寶達桑阿酌量辦理計將應派十二城回人彙齊查核已滿額數所有給與口糧行裝各事宜臣等續行定議具奏奏入報

聞

八月庚寅

伊犁將軍明瑞等疏奏巡查塔爾巴噶台起程

日期

明瑞等奏言前奏塔爾巴噶台駐兵一事先行
驅逐越境之哈薩克因就便勘定駐劄地方及
安設卡倫處所續奉

諭旨暫停辦理惟於來年秋季領兵巡查榜示曉諭
本年三月因有移駐涼州莊浪兵丁一事改議

俟駐防事竣約於後年遷移駐劄伏思塔爾巴
噶台駐兵雖暫緩其期仍須先為辦理來年建
造城房工程及安插孛眷兵丁恐無閒暇此時
正值秋高馬肥臣明瑞臣愛隆阿於七月十七
日帶滿洲蒙古兵丁五百名令領隊大臣鄂津
等隨往學習將從前阿桂所定塔爾巴噶台駐
兵設卡倫之處詳加勘驗即有越境之哈薩克
等亦可量為驅逐其沙喇孛勒特穆爾圖淖爾

等處來春令伊勒圖前往巡查現在酌將印務
交伊勒圖護理奏入報

聞

辛卯

葉爾羌辦事尚書都統新柱等疏奏回城餘錢
收買棉花事宜

新柱等奏言臣等前奏請將葉爾羌和闐二城
餘糧以八分作價換易紡絲布足以二分折錢

購買馬匹牲隻續奉

諭旨停止購買回人馬匹所折錢文似應流通行使
臣等公議現在駐防伊犁挈眷兵丁陸續前往
雖有換易布疋而棉花尤足供禦寒之用據伊
犁阿奇木伯克木薩告稱伊犁曾經試種棉花
土性不宜等語臣等與葉爾羌阿奇木伯克鄂
對商令購買回人棉花即動用折糧錢文據稱
於回人生計有益查二城折糧錢文共八千騰

格有奇除購買和闐金兩外仍有七千餘騰格
棉花每觔價錢十二文可得三萬餘觔其二城
應交正項錢丈夫給官兵鹽菜一應差務之餘
亦購買棉花運送伊犁則錢法流通而兵丁回
人衣食亦有裨益奏入報

聞

壬辰

諭喀什噶爾辦事尚書都統永貴等辦理哈薩克與

回人貿易事宜

工諭軍機大臣曰永貴等奏稱哈薩克阿布賚遣使獻馬其自帶馬九十餘匹已准令貿易等語哈薩克前在伊犁烏魯木齊往來並未至回地貿易且伊等至喀什噶爾必由布魯特等部落經過沿途頗有賊盜苟非貪圖重利焉肯前往現在伊犁等處貿易上等馬匹僅估價銀三四兩而回地則加倍有餘往來日久不但伊犁等處貿易大減亦恐

滋生事端但阿布賚素稱恭順此次既經准其貿易嗣後伊等再來必禁絕回人私市但從官買較之伊犁等處價值更減不可稍令獲利伊即欲帶回亦聽其便仍曉示來人以爾等從前並未來回地貿易况回地亦無須多購馬匹其各項牲隻自有拔達克山安集延布魯特等處商販爾等不必前來如此則貿易不得便宜伊等自不肯遠赴並將此傳諭伊犁烏魯木齊駐劄將軍大臣等知之

癸未

烏魯木齊辦事副都統侍郎旌額理等疏奏增築城工告竣請

旨頒賜嘉名

旌額理等奏言烏魯木齊所築二城六堡荷蒙欽定嘉名並准軍機處兼書滿漢蒙古回部字體臣等刊榜懸掛茲因駐劄舊城初係土堡周圍一里六分現在街市房屋漸加稠密擬將城垣加

高一丈六尺厚一丈添建四門八月內即可告竣再特訥格爾新開屯田建造營房一千二百間築城一座規制相仿計至冬初亦可竣事仰懇照從前城堡之例

賜以嘉名奏入報

聞尋

欽定烏魯木齊城曰迪化城東門曰惠字西門曰豐慶南門曰肇阜北門曰憬惠特訥格爾城曰阜

康城東門曰綏惠西門曰振威南門曰麗陽北門曰寧朔

己亥

陝甘總督楊應琚疏奏增墾巴里坤地畝情形
楊應琚奏言前因巴里坤地土廣衍水泉敷裕
請飭該同知於現在屯田之外召募開墾荷蒙
俞允隨據同知佟祿陸續開報商民認墾之地共八
千二百餘畝俱照水田之例六年陞科嗣後廣

為勸墾務期田野日闢戶口倍增以仰副

聖主區畫新疆足食裕民之意奏入報

聞

辛亥

散秩大臣伍彌泰疏奏晶河等三屯築堡告竣

請

旨頒賜嘉名

伍彌泰奏言上年阿思哈奏晶河有舊堡一座

計房一百七十餘間業經修理庫爾喀喇烏蘇
瑪納斯所修官兵駐劄營房一百餘間亦已告
竣伏思現在屯田處所俱屬伊犁烏魯木齊要
路今該處商人等陸續前來居人漸密可否照
伊犁等處之例將庫爾喀喇烏蘇等三處增修
堡座計庫爾喀喇烏蘇一堡四門晶河瑪納斯
皆一堡三門仰懇

恩賜嘉名以垂久遠奏入報

聞尋

欽定庫爾喀喇烏蘇曰綏來堡四門東曰延和西曰
迎顯南曰調薰北曰溥信晶河曰豐潤堡三門
曰咸寧曰同軌曰景風瑪納斯曰遂成堡三門
日即敘曰迪康曰覃化

壬子

諭副都統素誠等辦理屯田回人事宜

上諭軍機大臣曰據素誠奏稱烏什派出伊犁屯田

回人二百戶其應給口糧牲隻已向阿卜都拉籌
辦來年二月可抵伊犁等語從前各城伯克頭目
等因協助屯田回人俱加恩賞賚此次派往伊犁
回人頗衆該伯克等既照例協助自應一體辦理
若每次必候旨遵行頗覺繁瑣著傳諭素誠等即
照例分別賞給仍通諭駐劄回部各大臣嗣後有
似此協助之舉一面奏聞一面賞給不必仍前候

旨

九月丁巳

命賞布魯特阿瓦勒比四品頂帶

上諭軍機大臣曰永貴等奏稱回地水草不宜游牧
因布魯特阿瓦勒比情願移於該部落派人照管
伊復親身督率辦理已量給伊屬人羊隻茶封阿
瓦勒比甚屬奮勉可否加賞頂帶等語阿瓦勒比
夙著恭順茲復照管牧羣俾得蕃息甚屬可嘉著
加恩賞給四品頂帶以示鼓勵

壬戌

陝甘總督楊應琚疏奏酌撥挈眷兵丁馬匹及

起程日期

楊應琚奏言陝甘各標營挈眷駐劄烏魯木齊兵丁俱應隨帶馬匹恐長途多費請於烏魯木齊貿易馬匹內撥給其存營馬匹又可住支草料擇廠牧放撥補缺額嗣後再有移駐兵丁俱照例辦理至本年派往挈眷兵丁五百餘名合

計家口一千餘名俱於八月十六日以前全數起程奏入報

聞

甲子

伊犁副都都伊勒圖疏奏添辦布疋事宜

伊勒圖奏言准新柱等咨伊犁挈眷之滿洲索

倫察哈爾等人口甚多布疋棉花俱日用所必

需請將葉爾羌折糧錢文採買棉花三萬餘觔

解送等語查現在駐劄伊犁滿洲綠旗官兵各有原來衣被三年內尚可不須添補其索倫察哈爾兵丁多用皮衣是伊犁現在須棉無幾而與哈薩克貿易及修補兵丁衣服所用布疋甚多請將回城折糧錢文暫買棉花數千觔其餘盡買布疋尤為適用將來必須棉花之時又可酌量通融辦理奏入報

聞

丙寅

命議敘承辦錢法之同知圖桑阿等

上諭軍機大臣曰新柱等奏稱承辦葉爾羌鼓鑄錢文之同知圖桑阿千總戴鵬等自乾隆二十五年設立鑄局以來辦理頗屬勤慎等語圖桑阿等承辦鼓鑄錢文已閱三載現屆撤回著加恩交部議敘

戊寅

議科卜多屯田增派綠旗兵丁工匠事宜

定邊左副將軍成衮扎布奏言扎拉豐阿報稱
科卜多地土頗肥但蒙古等未諳耕墾若添派
綠旗兵一百名木石鐵匠數人於現在修補農
具將來建造城垣房屋俱有裨益奏入得

旨軍機大臣議奏尋議科卜多屯田已派喀爾喀兵
一百名綠旗兵一百名今既試有成效若添派
綠旗兵自屬有益臣等酌於烏里雅蘇台綠旗

兵二百名內派撥一百名資送既便亦可無悞
農時其缺額即以喀爾喀兵丁充補再所需工
匠亦即在該處酌派奏入

工從之

己卯

命賞給原任布政使亢保道員職銜前往哈密辦事

更換三寶回京

癸未

烏魯木齊辦事副都統侍郎旌額理等疏奏呼
圖畢屯田事宜

旌額理等奏言臣於上年十月奏派兵丁二百
名在特訥格爾伐木備造房屋一千二百間本
年七月告竣合計三城六堡所造兵房四千八
百間僅敷兵丁二千四百餘名居住其陸續挈
眷兵丁約六百名仍需造房一千二百間查羅
克倫以西地名呼圖畢田畝廣濶河水充裕木

植亦多約可駐兵二千名相其形勢東至寧邊城七十一里西至瑪納斯一百三十五里為哈薩克往來要路臣等酌於本年冬季砍伐木植計足工料運至造房處所將羅克倫換班兵丁六百名移於呼圖畢屯田所需農具籽種口糧亦請於冬間運往俟房屋工成即趨築城垣庶屯田兵丁三千名聲勢聯絡且多留地畝備給召募民人不致兵民叅雜似屬有益奏入得

旨如所請行

欽定四庫全書

平定準噶爾方略續編

三六

平定準噶爾方略續編卷二十二